



SIARAN AKHBAR
KEMENTERIAN KEWANGAN DAN EKONOMI

**MESYUARAT TAHUNAN LEMBAGA GABENUR-GABENUR ASIAN
INFRASTRUCTURE INVESTMENT BANK (AIIB) KE-10
24 – 26 Jun 2025
Beijing, Republik Rakyat China**




Photo credit: AIIB

1. Yang Berhormat Dato Seri Setia Dr. Awang Haji Mohd Amin Liew bin Abdullah, Menteri di Jabatan Perdana Menteri dan Menteri Kewangan dan Ekonomi II Negara Brunei Darussalam dan Gabenor mewakili Negara Brunei Darussalam di AIIB telah menghadiri Mesyuarat Tahunan Lembaga Gabenor-Gabenur AIIB ke-10 yang telah diadakan pada 24 hingga 26 Jun 2025 di Beijing, Republik Rakyat China.
2. Dengan tema "*Connecting for Development, Collaborating for Prosperity*", Mesyuarat Tahunan tersebut telah memberikan peluang kepada ahli-ahli AIIB untuk mengkaji pencapaian AIIB sepanjang dekad pertama operasinya, sejak penubuhannya pada tahun 2016.
3. Tuan Yang Terutama Li Qiang, Perdana Menteri Republik Rakyat China, menyampaikan ucap-tama pada Majlis Perasmian, di mana beliau menekankan pertumbuhan AIIB dan pelaburan besar dalam projek-projek di seluruh negara

ahlinya. Perdana Menteri Li Qiang juga mengemukakan tiga aspirasi untuk masa depan AIIB termasuk memberikan sokongan yang lebih kukuh dalam meningkatkan keupayaan pembangunan ahli-ahli AIIB melalui pembiayaan berkualiti tinggi dan kos rendah; menegakkan regionalisme terbuka, memajukan kesalinghubungan dan mengukuhkan sinergi dengan *Belt and Road Initiative* serta memanfaatkan peranan AIIB sebagai platform pelbagai hala baharu. Dalam ucapannya, Presiden AIIB, Jin Lique mengimbas kembali pencapaian, inisiatif dan hala tuju dasar Bank sepanjang 10 tahun lalu dalam merangsang pembangunan infrastruktur serantau, mengurangkan kesan cabaran global dan menekankan kepentingan kesalinghubungan rentas sempadan, pembiayaan hijau, mobilisasi modal swasta, transformasi digital, dan kerjasama strategik.

4. Semasa Sesi Meja Bulat, Gabenor-Gabenor memberikan panduan mengenai hala tuju masa depan AIIB termasuk melalui memupuk pembangunan dan kesalinghubungan infrastruktur. Yang Berhormat Dato Dr. Menteri di Jabatan Perdana Menteri dan Menteri Kewangan dan Ekonomi II berkongsi pandangan Negara Brunei Darussalam bahawa AIIB boleh menggalakkan kerjasama yang lebih besar dalam memitigasi perubahan iklim dengan mengintegrasikan pengurangan risiko bencana ke dalam infrastruktur serantau, melabur dalam sistem amaran awal, menggalakkan penyelesaian berasaskan alam semula jadi dan membangunkan pembiayaan inovatif untuk penyesuaian. Negara Brunei Darussalam juga menggalakkan Bank untuk memudahkan akses yang lebih baik bagi negara-negara kecil melalui kerjasama strategik.
5. Semasa Mesyuarat tersebut, Yang Mulia Zou Jiyi telah dipilih sebagai Presiden AIIB baharu bagi menggantikan Presiden Pengasas Jin Lique apabila tempoh perkhidmatannya berakhir pada Januari 2026. Mesyuarat Tahunan AIIB ke-11 akan diadakan pada bulan September 2026 di Doha, Qatar.

6. Yang Berhormat Dato Dr. Menteri di Jabatan Perdana Menteri dan Menteri Kewangan dan Ekonomi II juga telah mengadakan perjumpaan bersama dengan Presiden AIIB, Jin Liqun di mana perbincangan memfokus kepada penerokaan kerjasama yang lebih erat antara Negara Brunei Darussalam dan AIIB dalam pelbagai bidang berkepentingan bersama.



Photo credit: AIIB

7. Sebagai sebuah bank pembangunan pelbagai hala, AIIB bertujuan untuk meningkatkan hasil ekonomi dan sosial di rantau Asia melalui pelaburan infrastruktur dengan tumpuan kepada projek-projek dalam sektor seperti pengangkutan, tenaga, air dan komunikasi. Mesyuarat AIIB diadakan setiap tahun dan menghimpunkan Gabenor-Gabenor daripada 110 negara ahli, termasuk Negara Brunei Darussalam.
8. Yang Berhormat Dato Dr. Menteri di Jabatan Perdana Menteri dan Menteri Kewangan dan Ekonomi II turut mengadakan beberapa mesyuarat dua hala dengan Puan Yang Terutama Indranee Rajah, Menteri di Pejabat Perdana Menteri, Menteri Kewangan Kedua dan Menteri Pembangunan Negara Kedua Singapura; Yang Mulia Zhou Haibing, *Vice-Chairman of the National Development and Reform Commission* Republik Rakyat China serta Yang Mulia Yan Dong, Timbalan Menteri di Kementerian Perdagangan Republik Rakyat China. Perbincangan semasa Mesyuarat-Mesyuarat tersebut telah memfokus kepada peningkatan kerjasama dua hala di antara Negara Brunei Darussalam dan Singapura serta Negara Brunei Darussalam dan Republik Rakyat China dalam pelbagai bidang berkepentingan bersama.

-TAMAT-

Disediakan oleh:

Bahagian Hal Ehwal Antarabangsa

Kementerian Kewangan dan Ekonomi

Negara Brunei Darussalam

Emel: pr@mofe.gov.bn

Rujukan: KKW/ADM/70

Tarikh: 28 Jun 2025